

## **ORDENANZA REGULADORA DAS TAXAS POR PERCIBIR ENSINANZA NA ESCOLA DE MUSICA DO BARCO DE VALDEORRAS**

### **Artigo 1º.- Fundamento e natureza.**

Este Concello, conforme co autorizado polo artigo 106 da Lei 7/1985, do 2 de abril, reguladora das bases do réxime local, e de acordo co previsto no artigo 20.4.v) do texto refundido da Lei reguladora das facendas locais, aprobado polo Real decreto lexislativo 2/2004, do 5 de marzo, establece a taxa por ensinanza na Escola de Música, que se regulará por esta ordenanza, redactada conforme co disposto no artigo 16 do texto refundido da Lei reguladora das facendas locais, aprobado polo Real decreto lexislativo 2/2004, do 5 de marzo, citada.

### **Artigo 2º.- Feito imponible.**

Constitúe o feito imponible deste tributo a prestación polo Concello do Barco de Valdeorras dos servizos da Escola de Música.

### **Artigo 3º.- Aplicación da taxa.**

A taxa considerarase aplicada, nacente a obrigaón de contribuír, coa iniciación da prestación do servizo, que será o momento no que se formalice a correspondente matrícula.

### **Artigo 4º.-Suxeitos pasivos.**

Serán suxeitos pasivos contribuíntes as persoas físicas ou xurídicas, así como as entidades a que se refire o artigo 35 da Lei xeral tributaria, que soliciten o servizo para as persoas beneficiarias del.

### **Artigo 5º.- Responsables.**

1.- Responderán solidariamente das obrigaóns tributarias dos suxeito pasivo as persoas físicas e xurídicas a que se refiren os artigos 41 e 42 da Lei xeral tributaria.

2.- Serán responsables subsidiarios da débeda tributaria as persoas ou entidades a que se refire o artigo 43 da Lei xeral tributaria, nos supostos e co alcance que o citado precepto sinala.

### **Artigo 6º.- Tarifas.**

A contía da taxa regulada nesta ordenanza fiscal será a fixada na tarifa seguinte:

- Dereitos de matrícula ordinaria por clases individuais con linguaxe musical: **327,54 €.**
- Dereitos de matrícula ordinaria por clases individuais sen linguaxe musical: **224,54 €.**
- Dereitos de matrícula ordinaria por clases colectivas con linguaxe musical: **203,94 €.**
- Dereitos de matrícula ordinaria por clases colectivas sen linguaxe musical: **153,72 €.**

### **Artigo 7º.- Normas de xestión.**

1.- A taxa por matrícula esixirase en réxime de autoliquidación.

2.- Cando se presente a solicitude de inscrición para a utilización dos servizos da Escola de Música presentarase debidamente cuberto o impreso de autoliquidación da taxa.

Alternativamente, poden presentarse na oficina municipal correspondente os elementos da declaración, co obxecto de que un funcionario municipal preste a axuda necesaria para determina-la débeda.

3.- Os alumnos que se encontren nos supostos de tarifa reducida deberán unir ó impreso de autoliquidación os seguintes documentos:

\* Fotocopia compulsada do libro de familia.

4.- O ingreso da taxa de matrícula ordinaria poderá fraccionarse ata un máximo de tres veces de acordo co seguinte calendario:

a) Primeiro ingreso.- Ó formaliza-la matrícula e polo 50% do seu importe.

b) Segundo ingreso.- Antes do 31 de xaneiro o 30% do seu importe.

c) Terceiro ingreso.- Antes do 30 de abril o 20% restante.

Para o caso de que non poida efectuarse o cargo automaticamente, os ingresos dos prazos 2º e 3º realizaranse mediante recibo xerado polo Concello que se cargará na conta corrente do obrigado ó pagamento e polo importe que corresponda.

5.- Os alumnos acollidos ó sistema de matrícula fraccionada deberán facer constar inescusablemente no impreso de autoliquidación o número de conta corrente onde desexan que lle sexan cargados os recibos sinalados no punto anterior.

6.- O non pagamento dalgún dos prazos fraccionados suporá para o alumno a anulación da matrícula, coa perda das cantidades xa aboadas e tódolos demais dereitos que pudieran corresponderlle.

7.- Soamente procederá a devolución das cantidades aboadas para o caso de que o interesado ou o seu representante renuncien por escrito á inscrición con data anterior ó 1 de outubro de cada ano.

### **Artigo 8º.- Exencións e bonificacións.**

1º.- De conformidade co disposto no artigo 9 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, non se recoñecerá beneficio tributario ningún, agás os previstos nesta ordenanza e os que sexan consecuencia do establecido nos tratados ou acordos internacionais, ou os expresamente previstos en normas con rango de lei.

2º.- En atención ó disposto no artigo 24.4 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, bonificarase a tarifa no caso en que se dea algún dos seguintes supostos:

Que dous ou máis membros dunha mesma unidade familiar se matriculen para recibir ensinanza na Escola de Música do Barco de Valdeorras. Neste caso, reducirase a tarifa de acordo coa seguinte escala:

1.a. Se os matriculados son dous membros da mesma unidade familiar: 20% de desconto en cada unha das matrículas.

1.b. Se os matriculados son tres membros da mesma unidade familiar: 25% de desconto en cada unha das matrículas.

1.c. Se os matriculados son máis de tres membros da mesma unidade familiar: 35% de desconto en cada unha das matrículas.

3º.- Os matriculados membros de familia numerosa terán dereito ós seguintes beneficios:

a) Familias numerosas de primeira categoría: redución das taxas nun 50%.

b) Familias numerosas de honor e segunda categoría: exención total de taxas.

4º.- Os alumnos acreditarán o seu dereito de bonificación acompañando ó impreso de autoliquidación os seguintes documentos:

a) Os que teñan dereito a bonificación por pertencer un ou varios dos matriculados á mesma unidade familiar, acreditarano mediante fotocopia compulsada do libro de familia.

b) Os que teñan dereito a bonificación por familia numerosa, acreditarano mediante copia compulsada do título de familia numerosa en vigor.

5º.- Os matriculados pertencentes á Banda de Gaitas, terán dereito a unha bonificación de ata o 100% da cota tributaria,

exclusivamente en relación á ensinanza do instrumento de gaita, non sendo de aplicación esta bonificación ó resto de servizos prestados pola Escola de Música. Estes alumnos acreditarán o seu dereito de bonificación acompañando ó impreso de autoliquidación un informe emitido e rubricado polo director/a da Escola de Música no que se acredite a condición de membro da Banda de Gaitas do alumno matriculado solicitante da bonificación.

Terán dereito a unha bonificación do 100% da cota tributaria aqueles alumnos que acrediten, conforme coa documentación arriba enunciada, a súa condición de membros da Banda de Gaitas e, ademais, permanezan na dita condición durante todo o período de prestación de servizos de ensinanza musical ou curso académico completo.

Este beneficio fiscal pode ser obxecto de minoración como consecuencia do cese na condición de membro da Banda de Gaitas do alumno matriculado beneficiario da bonificación, circunstancia que debe ser posta en coñecemento do Departamento de Tesourería e Recadación por parte do director/a da Escola de Música, para os efectos de tomar razón do nacemento dunha nova cota tributaria, pro rateada polos trimestres naturais que resten ata a finalización do curso académico, computados dende o seguinte trimestre a aquel no que se produza o dito cese.

6º.- As exencións e bonificacións que se outorguen nesta taxa non serán acumulables, debendo o interesado optar soamente por unha delas.

#### **Artigo 9º.- Infraccións e sancións.**

En todo o relativo á cualificación de infraccións tributarias e sancións, ademais do previsto nesta ordenanza, estarase ó desposto no título IV (artigos 178 e seguintes) da Lei xeral tributaria e demais normativa aplicable.

#### **Artigo 10º. Notificacións das taxas.**

Ó abeiro do que prevé a disposición transitoria segunda da Lei 25/1998, as taxas de carácter periódico reguladas nesta ordenanza, que son consecuencia da transformación dos anteriores prezos públicos, non están suxeitas ó requisito de notificación individual, sempre que o suxeito pasivo da taxa coincida co obrigado ó pagamento do prezo publico ó que substitúe.

#### **Disposición derogatoria.**

Queda derogada a Ordenanza fiscal reguladora da taxa por recibir ensinanza na Escola de Gaitas con efectos dende a entrada en vigor desta ordenanza fiscal.

#### **Disposición final.**

Esta ordenanza fiscal entrará en vigor o día seguinte ó da súa publicación no Boletín Oficial da Provincia e comezará a rexer dende o mesmo día, permanecendo en vigor ata a súa derogación ou modificación expresa.

2º.- De conformidade co disposto no artigo 17.1. do Real decreto 2/2004, do 5 de marzo, este acordo provisional exporase ó público no taboleiro de anuncios do concello durante o prazo de 30 días hábiles, co fin de que os interesados poidan examina-lo expediente e presenta-las reclamacións que estimen oportunas.

3º.- A dita exposición ó público anunciarase no BOP de Ourense, nun periódico dos de maior difusión na provincia, e comezará a conta-lo seu prazo dende o día seguinte á inserción do anuncio no BOP.

4º.- No caso de que non se presenten reclamacións, e de conformidade co establecido no artigo 17.3. do Real decreto 2/2004, o acordo ata entón provisional quedará elevado a definitivo, sen necesidade de acordo plenario.

De acordo co establecido no artigo 19 do texto refundido da Lei reguladora das facendas locais, contra este acordo poderá interporse recurso contencioso-administrativo na forma e prazos que establecen as normas reguladoras da dita xurisdición.

O Barco de Valdeorras, 17 de outubro de 2008.

O alcalde.

APROBACION BOP N° 251  
DE FECHA 29 DE OCTUBRE DE 2008

\* Con la aprobación de esta ordenanza queda derogada la ordenanza reguladora de la tasa por percibir enseñanza en la escuela de gaitas

\* Modificación 2011 BOP nº de fecha 9 de diciembre de 2011 , se modifica el art.6